

Mensajen PR Lú Olo Kona-ba Dependente Ba Fundu Minarai Pertenente



Deputada hosi bankada PLP, Maria Angelina Sarmento. Imajen Egas Cristovão

DILI, 28 novembru 2019 (TATOLI)—Mensajen Prezidente Repúblika (PR), Francisco Guterres ‘Lú Olo’ kona-ba Timor-Leste dependente ba fundu minarai pertenente tanba despeza boot liu kompara ho retornu.

“Mensajen ida-ne’e pertenente tanba ita-nia Estadu, konstituisaun hatuur kona-ba *check and balance*, órgaun soberania ida iha separasaun podér maibé iha interdependénsia ba malu. Ne’e kna’ar ida hosi Prezidente Repúblika nian atu fó nia pontu devista kona-ba Orsamentu Jerál Estadu”, Vise-Prezidente Parlamentu Nasionál, Deputada Maria Angelina Sarmento, ba jornalista sira, iha resintu Parlamentu Nasionál, kinta ne’e.

Nia dehan, Prezidente Repúblika konstitusionalmente garante unidade nasional no ida tan maka oinsá atu fó hanoin ba órgaun polítika sira atu haree didi’ak oinsá jere rekursu naturál sira.

Pontu devista Prezidente Repúblika, Francisco Guterres ‘Lú Olo’ nian iha âmbito Komemorasaun Loron Proklamasau 28 Novembru ba dala-44, iha Palásiu Governu, kinta ne’e, hateten ekonomia ne’ebé depende de’it ba mina halo nasaun fraku no bele lakon nia soberania.

“Urjente tebes atu diversifika ita-nia ekonomia, hodi halakon dependénsia ba minarai no gás liuhosi dezvoltimentu ita-nia setór produtivu hanesan agro prosesamentu, manufatura no turizmu, peska no sira seluk tán”, PR Lú Olo esklares.

Tuir nia katak diversifika ekonomia sei halo Timor-Leste sai ezemplu di’ak ida kona-ba dezvoltimentu sustentável, ho ambiente ida ke di’ak, liuhosi enérgia renovável hodi nune’e povu bele moris di’akliu no bele atraí investimentu esternu.

Prezidente Repúblika nota katak durante tinan sanulu resin Governu sira ukun ho orsamentu ne’ebé boot no obriga foti osan barak liuhosi Fundu Minarai.

Maibé, dala barak liu ezekusaun orsamentál la to’o pursentu sia-nulu (90). Hahú iha tinan 2005 to’o 2018, transfere ona osan husi Fundu Minarai liu biliaun 10 hodi finansia despeza públika.

Hatán ba preokupasaun ne’e, Deputada Maria Angelina Sarmento haklaken, mensajen Xefe Estadu nian fanu polítiku sira atu liberta povu hosi ki’ak no mukit.

“Ida-ne’e mensajen importante ba ami hanesan polítiku hodi haree filafali saida maka ami bele halo atu hadi’a di’ak liután povu nia moris”, nia katak.

Vise-Prezidente PN Preokupa Ezijénsia PR Lú Olo Ba Diálogu



Vise-Prezidente Parlamentu Nasionál, Maria Angelina Lopes Sarmento. Imajen Tatoli/Egas Cristóvão

DILI, 28 novembru 2019 (TATOLI)—Vise-Prezidente Parlamentu Nasionál (PN), Deputada Maria Angelina Sarmento, preokupa ho ezijénsia Prezidente Repúblika, Francisco Guterres ‘Lú Olo’, tanba presiza define tipu diálogu ne’e.

“Ezijénsia Prezidente Repúblika ba diálogu ita la hatene diálogu polítiku ka diálogu ida baibain ka diálogu saida. Presiza énfaze atu ita bele hatene diálogu ne’e katak diálogu ho polítiku sira, ka diálogu ho sosiedade sivíl ka ho povu baibain”, deputada ne’e informa ba jornalista sira, iha resintu Parlamentu Nasionál, ohin.

Deputada Partidu Libertasaun Populár (PLP), rekoñese pedidu diálogu ne’e Prezidente Repúblika nian hanesan buat ne’ebé hatuur iha konstituisaun, maibé presiza define ho klaru.

Iha âmbito Komemorasaun Proklamasan Independénsia ba dala-44 ne’e, mensajen Prezidente Repúblika (PR), Francisco Guterres ‘Lú Olo’ kontinua ezije diálogu.

“Ha’u iha konfiansa katak ita sei nafatin fó ita-nia kontribuisaun ativu iha aspetu hotu-hotu hodi partisipa iha diálogu permanente ida hodi buka dalan no konsensu oinsá estratéjia atu hasoru dezafiu hotu-hotu ne’ebé afeta ita-nia sosiedade tomak”, mensajen PR Lú Olo, iha Palásiu Governu, ohin.

Jornalista: Evaristo Soares Martins Editór: Xisto Freitas

Arão Noé: Diferensa Polítika Labele Hafahe Timoroan



Prezidente Parlamentu Nasionál, Arão Noé de Jesus da Costa Amaral.
Imajen Tatoli/António Gonçalves

DILI, 28 novembru 2019 (TATOLI)–Prezidente Parlamentu Nasionál, Arão Noé de Jesus da Costa Amaral, hateten diferensa polítika ne'e normál, importante mak diferensa ne'e labele hafahe timoroan.

“Diferensa polítika ne'e buat normál. Ha'u hein katak diferensa labele fahe ita, tanba objetivu ita hotu nian luta ba povu nia moris di'ak”, Arão Noé ko'alia iha ámbitu Komemorasaun 28 Novembru ba dala-44 ne'ebé realiza iha Palásiu Governu, ohin.

Nia husu ba nai-ulun boot sira, joven no povu tomak, atu fó liman ba malu hodi kontribui estabilidade.

“Sein estabilidade, dezentvolvimentu labele la'o. Estabilidade mak bele dezentvolve rai ida-ne'e hodi atinje objetivu povu moris di'ak no dignu”, nia subliña.

Jornalista: Evaristo Soares Martins

Editór: Xisto Freitas